

考工典第一百七十五卷

車輿部藝文一

書車

周武王

自致者急載人者緩取欲無度自致而反

車銘

後漢馮衍

乘車必護輪治國必愛民車無輪安處國無民誰與

車左銘

崔駰

虞夏作車取象璣衡君子建左法天之陽正位受綏車不內顧塵不出軌鸞以節步彼言不疾彼指不躬遠覽於道永思厥中

車右銘

前人

擇御卜右採德用良詢納耆老於我是匡惟賢是師惟道是式箴闕旅賁內顧自敕匪皇其度匪愆其則越戒敦儉禮以華國

車後銘

前人

敬其在路體貌思恭望衡顧轂允慎茲容無或好佚匪盤於遊顧省厥遺虎尾斯求昭德塞違抑盈以無雖有三晉欲然若虛

小車銘

李尤

圓蓋象天方軫則地輪法陰陽動不相離合之噉噓疏遠開通兩輜障邪尊卑是從輓軌之用信義所同

天駟車銘

前人

奚氏本造後裔飾雍輪以代步屏以蔽容輪駟并合出入周通追仁赴義惟禮是恭

名器

黃憲

徵君將如齊魯王賜以黃金百斤徵君謝而不受乃以所乘之輿賜之徵君出魯之疆對魯使而言曰憲聞先王辨物以章軌光耀一世故車服有等爵賞有度使諸侯士庶無相瀆也今魯王之與諸侯之器也而賜布衣之士瀆也大矣夫禮以防瀆瀆則僭僭則淫淫則亂亂則滅春秋之鑒固不遠

也諸侯之欲親士豈無彝器而必以輿乎焉可瀆也昔我漢祖剪強秦之緒而光有天下封建同姓割土而諸侯之魯得以徼福於周公伯禽以庇其子孫保其宗廟而恆有其國朝覲以懷之宴享以親之錫命以榮之此天子所以寵綏諸侯者也然諸侯不能有其民人食其廣土以述其職事有封建之形業而無其權命以魯國之弱不於此時躬修仁義以懷其民神則百歲之後魯其爲墟乎而況瀆其器以自同於徒行之旅是失其所載神弗祐也夫爲士者猶策驢以代勞況於諸侯乎今去魯而出疆朝歷山川夕犯霜露士之勞也若乘魯王之輿而見齊王則齊王之輿猶魯也齊王以爲魯不能禮而瀆之以器士不能貞而瀆之以躬是輕鄰國而恥士又何達焉夫天子以輿載命諸侯以輿載職士以輿載道今以載職者而載道弗可行於諸侯也子爲我辭魯使返其輿而告魯王魯王歎曰齊其得士乎是歲魯王俘其弟妻以寵妾易之君子是以知魯之不能禮也

車賦

梁甄元成

鑄金磨玉之麗凝土剡木之奇體衆術而特妙未若作車而載馳爾其車也名稱合於星辰圓方象乎天地夏言以庸之服周曰聚焉之器制度不以陋移規矩不以飾異古今貴其同軌華夷獲其兼

利爾其利也天子以郊祀田伐諸侯以朝聘會盟庶人以商農工賈遠裔以致蕃遷生爾其作也均輕重而攻材正陰陽而斲木既中正而合剖亦面勢而審曲候離婁之督繩須公輸而削墨布骸服之有定施爪牙之不忒既涉用於牛馬亦受名於羊鹿爾其容也侔蓋樹之獨立似高雲之出嶽獨映水也如舞鸞之對鏡衆行陸也若翔鴻之赴遠聽長響之轢轢望遙儀之婉婉信有美兮宜比興徒欲貌兮不能辨及其駕也望珊瑚之駐引絕羣之駿既綵鞵之縈頭亦銅鉤而瑩角始向輓而龍轉就入轅而獸躍或黝黝而鳴鼻或參差而動脚咆哮歇轉鬱快隕閣見輪陰之翻亂視帶影之飛泊及其乘也或方夏虐暑炎氣歆烈浮幘動以來風輕紗飛而去熱纖埃著而卽墜煩氣衝而受歇或固陰沍寒祁嚴凜厲覆帷下而前屏重幘垂而後蔽霜露侵而靡及風颺激而不戾或油雲雨霏中達半恢宏宇宙而雷奔杼軸割而去衍被洪流染而自落散水瀄而不霑

指南車賦

唐張彥振

緬窺皇始傾聽巢風時儀朴略化跡冥蒙結繩云謝徽章漸通乃服牛而乘馬爰斲木而觀蓬故聖人因象以制器隨物而興功北斗在天察四時而行度司南在地表萬乘之光融爾其法制奇詭神

妙無窮見其指而皆知其向觀其外而莫測其中輪須藉於奚子妙乃發於周公觀夫作也肩關脉
湊衡樞星設烟縈電轉鬼聚神滅離朱目亂計然思絕公輪服其心工王爾慚其手拙雖詞給而口
敏終難得而縷說至如帝容順動王塗允泰二月東巡萬國南會羽衛出而天動笳鼓鳴而雷磕司
南於是備屬車引行旆候薰風而進指仰卿雲而乘蓋招搖光景之中縹緲烟霞之外同夫越鳥常
有意於南枝異被魯人竟無情於殿最惟皇明之遠矚驅八駿以遐舉既訪道於襄城亦尋仙於海
渚豈須老馬之智寧藉小童之語賴我司南不迷其所伊司南之用溥逢國道之昌平就日月於天
路聞驚韶於玉京常使朝朝承北闕何辭歲歲指南行

大章車賦

闕名

舜爲君兮禹爲相七政齊兮八風暢備禮容兮和樂章同車書兮一度量龍樓蒸已則無爲以垂衣
鸞蹕豫遊或有時而端望伊大章之攸作冠輪輿而爲上其始也委材質於資斧授規模於梓匠其
終也援桴鼓於天街動輓輒於霜仗乃畫界疏疆正位辨方候之以節步先之以啟行象雷而鳴曾
不聞其靈轟如蓬之轉終不見其飄揚遵彼坦途違茲險阻勿忘情而習靜殊不知其處所類智者

之行藏同至人之默語歷代傳寶鼓車逾好有異人謀宛同靈造行不由徑動能合道向使貴賤混并高卑不問應無迷達之疾詎有窮途之患則是大章爲器國容之利指方位於遙空數田里於厚地節六鼓以鼃駭首五輅而鱗次望塵不及初非千里之遙聽響爭先終欣一日而至夫然則可以式序秩宗發揮樂府扶持輦轂隱翳千羽以家形國何一二之能談自邇陟遐雖萬億而可數墨客胡爲來攀桂枝懸鼓待鳴仰淳淳之風俗剋車就駕識穆穆之威儀伊可大而可久諒斯焉而取斯

蒲輪賦

王起

王者崇招隱之禮作徵賢之車旣斲輪而合度亦安蒲而用諸將使丘園共責巖穴皆虛則必旌其重貺建此大輿輪合大規取邁而行陸蒲兼柔質取坐以安居罔覆其軌轍可歷於丘墟載以歸朝盡是漸鴻之翼駕而出野方隨繫鶴之書恆翹翹而隱隱諒求士之本歟若乃山騁異人林栖隱者鳥獸之羣方雜薜蘿之衣未捨或屠釣而忘名或版築而在野恥芟芟之帛厭禮未崇笑子子之旌好善猶寡然後時主仄席哲匠精研載脂載華旣攻旣堅蒲也採陂澤之叢有車之用輪也斲陰陽之木如日之圓輜輻兮出中朝之禮盛轆轤兮入外野而光宣於是輕營草澤轡轢雲烟瞻其儀無

虧於翼翼聆其響且異乎闐闐可以出嘉遁之碩德可以載傲俗之遺賢空谷有車自爾而方響鳴
皋者鶴假我而聞天豈獨邀申公於是日徵鈞叟於昔年則知輪之設蒲巖局是敗將毗王者之政
先保賢人之體至萬里之安安成百僚之濟濟豈比夫織而爲席表臧孫之不仁緝以成宮昭令尹
之非禮方今雋己在官輪猶未安旁搜叢桂遠掇幽蘭士不病於邁種賢盡出於峰巒是蒲輪之禮
也乃王化之端而已哉

墨子廻車朝歌賦

前人

墨子慮厥居慎所如轉華轂遊殷墟疾朝歌爲名知非良邑惟時邁有度用廻德車將以擇樂國垂
盛則舉足爲龜鏡立身乎繩墨每自西而自東咸作範而作式始其命駕徘徊發軔員來豈半途而
有廢將由逕而無猜雜彼行人初儻儻而同造問於及境終輶輶而獨廻乃曰歌樂者人必有度朝
夕者天之所賦苟名而不臧曷邑之足顧由是反征輪遵大路比危邦之不入同覆轍之是懼載脂
載壘却新逕而不疑如輕如軒乃舊蹊而是遡諒無阻於寸進實自懲於跬步借如不戒乎謠不恆
乎朝自然哀樂失節威儀莫昭何足以枉君子之車瞻夫翼翼來長者之轍美以翹翹是用處身於

克正示衆以不佻雖大道甚夷卒如九州之險大都孔邇邈成千里之遙足以戒居人警行子革詠歌之俗作道途之紀改轅不爽於歸歟反路自忘於勞止行將趨樂土走仁里彼邑之士莫得式其軒彼邑之塵莫得及其軌宜乎非禮勿動惟真是履與孔門而齊教將宋國而專美莫不始於廻輪而彰乎勵已嗟乎車之攸避也尙誠乎歌身之攸指也矧至於頗則懼柏人之不宿恥勝母而不過此車之旨也未足居多

說車贈楊誨之

柳宗元

楊誨之將行柳子起而送之門有車過焉指焉而告之曰若知是之所以任重而行於世乎材良而器攻圓其外而方其中然也材而不良則速壞工之爲功也不攻則速敗中不方則不能以載外不圓則窒拒而滯方之所謂者箱也圓之所謂者輪也匪箱不居匪輪不塗吾子其務法焉者乎曰然曰是一車之說也非衆車之說也吾將告子乎衆車之說澤而杼山而侔上而輕下而軒且曳祥而曠左革而長轂以戰巢焉而以望安以愛老輜以蔽內垂綬而以畋載十二旒而以廟以郊以陳於庭其類衆也然而其要存平材良而器攻圓其外而方其中也是故任而安之者箱達而行之者輪

恆中者軸搗而固者蚤長而撓進不罪乎馬退不罪乎人者轅却暑與雨者蓋敬而可伏者軾服而制者馬若牛然後衆車之用具今楊氏仁義之林也其產材良誨之學古道爲古辭冲然而有光其爲工也攻果能恢其量若箱周而通之若輪守大中以動乎外而不變乎內若軸攝之以剛健若蚤引焉而宜御乎物若轅高以遠乎污若蓋下以成乎禮若軾險而安易而利動而法則庶乎車之全也詩之言曰四牡騤騤六轡如琴孔氏語曰左爲大官右爲執法此其以達於大政也凡人之質不良莫能方且恆質良矣用不周莫能以圓故孔子於鄉黨恂恂如也遇陽虎必曰諾而其在夾谷也視此齊侯類畜狗不震乎其內後之學孔子者不志於是則吾無望焉耳矣誨之吾戚也長而益良方其中矣吾固欲其任重而行於世懼圓其外者未至故說車以贈

德車結旌賦

宋宋庠

君有至德時乘大車當偃革以無外乃結旌而有初奉駕陳儀采物雖資於備設鳴鸞示禮旂旐匪俟於垂紓順考前經鋪聞往說謂戎事以旣息貴君車之有結雍容撫軾蓋藏飾以尙純肅穆展鈴詎垂旒而就列蓋由抑乃盛飾昭夫令名雖冠品於輿服茂揚威於旃旌肅軫無譁方斂藏於旂厲

馳輪有度靡赫奕於綬纓且夫禮有質文器隨用舍車號乎德則崇化於邦本旌結其表則示人於天下意自象見名非人假君軒弭節孰訝乎卷而懷之國乘制容益顯乎素爲貴者是知車之用兮充德以成大旌之飾兮輔威而孔昭旣武怒之不作信軍容而外銷組轡敢行陋邦旄之子子錯衡遵路殊風旆之搖搖若然則動有彝儀文無異色雖駸駕以備物終去華而表德故使禮典攸重民瞻不忒皇皇整御始中括於采章轡轡肅容豈外揚於藻飾用能上載明德旁昭緝儀自駕言而戾止殊幅裂以藏之升降惟寅僅比非心之屋章明盡屏寧同止獵之綬大矣哉邦禮是崇帝儀資治實務德以垂教必收旌而昭理宜乎國容備而兵器銷率由茲而盡矣

車賦

宋吳淑

聖人作舟車以濟不通故車始於推輪因彼飛蓬金輅則樊纓九就耕根則青質三重或駕於阜下或挽彼轅中或驅塵而出軌當擊轂以移風若夫朱英綠縵文茵暢轂公侯則紫蓋兮朱裏乘輿則黃屋兮左纛力戰則朱血之染輪疾譏則羣輕之折軸伏波之思下澤楚子之及蒲胥方載脂而載轡豈弗馳而弗驅施組銜璧析羽流蘇陳平方交於長者輪扁俄譏其古書漢則婕妤辭輦魏則先

主同輿驚彼投人駭茲載鬼或號追鋒或如流水或因叔敖而高或鄙慶封之美不可疾言寧宜妄指沈慶之乘猪鼻王導之驅塵尾網絡朱絲徘徊黑耳葦則沛相筆聞楚子大路昭僉竿摩僭擬趙簡妙弊田茗惡侈太誓有牧野之陳遠行有祖軼之祭至如巢望晉軍樓呼宋人陳遵留客以投轄張綱獻直而埋輪爾其奚仲初製軒轅始作書著肇牽詩稱孔博豨膏棘軸之喻鹽浦染輪之樂或驅蒲輪或駕皮軒丞相之容馭吏尹喜之占老君桓榮稽古以荷賜魏舒喪子而承恩淳于既同於炙輠吳楚亦聞於徙轅直如生而繼如附方象地而圓象天亦有節以鳴鸞飾之雲母貳轂重牙倚龍伏虎亦聞長萬奔而輦母考叔爭而挾軻行澤欲杼行山欲伴視之不過乎五嶺御之必經乎三周則有指南司方起於涿鹿駟馬以駕信旛是矚見肅慎之獻雄聞鄭人之取玉馬鈞既洞其精微解飛亦言其委曲復有備其五色名之七香具之輓軌矩以陰陽杜林推之者鹿晉武馭之者羊駕牛聞張湯之禍乘驪觀劉禪之降諫趙同之共處戒寧戚之無忘周道之行有棧渭陽之贈乘黃又有三材之輪四寸之鍵千秋駕之而入宮安平御之而升殿彼傳祇與王導並優容於殊陞別有祥聞曠左武則綏旌上帝運斗以爲用天子建德以攸行東宮畫輪之制王后重翟之名不巾不蓋之

狀三望四望之稱龍首天矯以銜軛鸞雀聳峙而立衡間關之聲載脂茱萸之輞尤精及夫金薄繆龍之飾武剛陷軍之制如輕兮如軒左寶兮右僞四輪起於王莽平上本乎梁冀張季荷劉翽之仁汝南受晉武之賜或以香衣爲號或以畫雲表麗或輓廣而作賂或輅駟而更貴或爲輻以共轂或駟衡而挂轡巷出由於鄭人轍亂知於曹劇至夫專防風之骨見長狄之肩仕俄聞於生耳瑞或見於垂綏然丘則剛金爲輞奇肱則從風以飛美晏子之能讓嘉宰予之見辭辟惡記里之用黃鉞豹尾之儀斯國容之爲盛見文物之彰施

記里鼓車賦

元楊維禎

虛輪暈軫橫轅倚輓平廂層構低高間施木鐸象以正立手潛奮以有攜列鼓鐃於上下各扣擊以司時

車銘

明方孝孺

以廣載以剛運險則止易則進衆材得職乃不償

前題

前人

衆器堅車乃良百戰得賢成乃功朽轅腐輻乘者殃

車輿部藝文二詩

詠車

唐李嶠

天子馭金根蒲輪闢四門五神趨雪至雙轂似雷奔丹鳳棲金轄非熊載寶軒無階忝虛左珠乘奉

王言

車輹輹

金劉迎

馬虺隤牛殼鯨山行縈紆車輹輹路旁指點是官人老矣一翁雙鬢禿汝牛幸可耕汝馬幸可騎有此可載琴書歸胡爲奔走東西道白髮刁騷被人笑

車輿部紀事一

竹書紀年帝堯五十年遊於首山乘素車元駒

書經虞書益稷謨予乘四載

注

四載水乘舟陸乘車泥乘輹山乘櫟也

史記夏本紀禹陸行乘車山行乘輹

注

輹車謂以鐵如錐頭長半寸施之履下上山不蹉跌也

十洲記蓬丘蓬萊山也昔禹治洪水既畢乃乘蹕車度弱水而到此山祠上帝於北河歸大功於九天

周禮地官鄉師之職大軍旅會同正治其徒役與其輦輦戮其犯命者注鄭康成曰輦駕馬輦人挽行所以載任器也止以爲蕃營

夏官射人大師令有爵者乘王之倅車注鄭康成曰倅車戎車之副

秋官野廬氏凡道路之舟車輦互者叙而行之注鄭鍔曰輦者相值而礙也互者交互而不行也推車於陸行舟於水阻隘之地偶相值而有輦互之阻因其先後至之叙以次而行之

韓詩外傳武王伐紂至邢丘輓折爲三天雨三日不休武王召太公而問之曰未可伐乎太公曰不然輓折爲三軍當分而爲三也天雨三日欲洗吾兵也

禮記明堂位成王以周公爲有勳勞於天下是以封周公於曲阜地方七百里革車千乘命魯公世祀周公以天子之禮樂是以魯君孟春乘大路載弧韞旂十有二旒日月之章祀帝於郊配以稷天子之禮也

古今注大駕指南車舊說周公所作也周公治致太平越裳氏重譯來貢白雉一黑雉二象牙一使者迷其歸路周公錫以文錦二疋車駟五乘皆爲司南之制使越裳氏載之以南緣扶南林邑海際暮年而至其國使大夫宴將送至國而還亦乘司南而背其所指亦期年而還至始制車轆轤皆以鐵還至鐵亦銷盡以屬巾車氏收而載之常爲先導示服遠人而正四方車法具在尙方故事

拾遺記周成王四年旃塗國獻鳳雛載以瑤華之車飾以五色之玉駕以赤象至於京師 成王

六年燃丘之國獻比翼鳥經歷百有餘國方至京師其中路山川不可記越鐵峴泛沸海虵洲蜂岑鐵峴峭礪車輪剛金爲輞比至京師輪皆絕銳幾盡又經虵洲則以豹皮爲屋於屋內推車

汲冢周書王會成王時白州獻比閭者其葉若羽伐其木以爲車終日行

拾遺記周穆王卽位三十二年巡行天下馭黃金碧玉之車使迹轂遍於四海

左傳隱公三年冬齊鄭盟於石門尋廬之盟也庚戌鄭伯之車僨於濟 十一年鄭伯將伐許五

月甲辰授兵於大宮公孫闕與潁考叔爭車潁考叔挾輶以走子都拔棘以逐之及大逵弗及子都

怒

桓公八年楚子伐隨戰於速杞隨師敗績隨侯逸鬬丹獲其戎車與其戎右少師

十五年春天

王使家父來求車非禮也諸侯不貢車服天子不私求財

莊公十二年冬十月蕭叔大心及戴

武宣穆莊之族以曹師伐之殺南宮牛於師殺子游於宋立桓公猛獲奔衛南宮萬奔陳以乘車輦其母一日而至

莊子天道篇桓公讀書於堂上輪扁斲輪於堂下釋槌鑿謂公曰公所讀者古人之糟粕也以臣之事觀之斲輪徐則甘而不固疾則苦而不入不徐不疾得之於手而應之於心口不能言有數存於其間而臣不能以喻臣之子臣之子亦不能受之於臣是以行年七十而老斲輪古之人與其不可傳也死矣故曰糟粕

呂氏春秋管仲至齊境桓公使人以朝車迎之祓以燿火罽以犧猊焉

淮南子秦穆公出遊而車敗右服失馬野人得之穆公追而及之岐山之陽野人方屠而食之穆公曰夫食駿馬之肉而不還飲酒者傷人吾恐其傷汝等徧飲而去之處一年與晉惠公爲韓之戰晉師圍穆公之車梁由靡扣穆公之驂獲之食馬肉者三百餘人皆出死爲穆公戰於車下遂克晉虜